

四庫全書薈要

• 乾隆御覽本

史部

資治通鑑卷一百三十七 宋 司馬光 撰

胡三省 音註

齊紀三

起上章教牂畫玄
默君灘凡三年

世祖武皇帝中

永明八年春正月詔放隔城俘二千餘人還魏

按隔城見上卷

上年 乙丑魏主如方山二月辛未如靈泉

泉下當有池字

壬申

還宮 地豆干頻寇魏邊

北史曰地豆干國在室韋之西千餘里

夏四月

甲戌魏征西大將軍陽平王頤擊走之頤新城之子也

新城當作新成見一百二十八卷宋孝武大明元年

考異曰陽平王頤帝紀作熙又作蹟今從本傳

甲午魏遣兼員外散騎常侍邢產等來聘

散志賈翻騎奇寄翻

五月己酉庫莫奚寇魏邊

隋書庫莫奚東部蕃之族為慕容氏所破遺落者竄匿松

漠之間其俗甚為不潔而善射獵好寇鈔後單稱為奚魏高宗皇興二年置安州治方城領密雲廣陽安樂等

郡

安州都將樓龍兒擊走之

將即亮翻

秋七月辛丑以會

稽太守安陸侯緬為雍州刺史緬鸞之弟也緬留心獄

訟得劫皆赦遣許以自新再犯乃加誅

劫謂劫盜也會工外翻緬彌充

翻雍於用翻

民畏而愛之 癸卯大赦 丙午魏主如方山

丙辰遂如靈泉池八月丙寅朔還宮 河南王度易侯

卒乙酉以其世子伏連籌為秦河二州刺史

考異曰齊書作世

子休留成今從魏書

遣振武將軍丘冠先拜授且弔之伏連籌逼

冠先使拜冠先不從伏連籌推冠先墜崖而死

冠古玩翻推吐

雷翻

上厚賜其子雄敕以喪委絕域不可復尋

復扶又翻

仕進

無嫌 荊州刺史巴東王子響有勇力善騎射好武事

自選帶仗左右六十人皆有膽幹

騎奇寄翻好呼到翻帶仗左右使之帶器

仗而衛左
右因名

至鎮數於內齋以牛酒犒之

數所角翻
犒苦到翻

又私

作錦袍絳襖欲以餉蠻交易器仗

襖烏
浩翻

長史高平劉寅

司馬安定席恭穆連名密啓上敕精檢

言精加
檢校也

子響聞

臺使至不見敕

使疏
吏翻

召寅恭穆及諮議參軍江念

念羊
茹翻

典籤吳修之魏景淵等詰之寅等祕而不言修之曰既

已降敕政應方便答塞景淵曰應先檢校

修之言方便
答塞欲為子

響道地也景淵言應先檢校
欲依敕行之也塞恚則翻

子響大怒執寅等八人於

後堂殺之具以啓聞上欲赦江念聞皆已死怒壬辰以

隨王子隆為荊州刺史上欲遣淮南太守戴僧靜將兵

討子響

將即亮翻

僧靜面啓曰巴東王年少長史執之太急

忽不思難故耳

少詩沼翻難乃旦翻

天子兒過誤殺人有何大罪

官忽遣軍西上

上時掌翻

人情惶懼無所不至僧靜不敢奉

敕上不荅而心善之

不荅而心善其言蓋天性所在而未敢撓國法也

乃遣衛

尉胡諧之游擊將軍尹略中書舍人茹法亮帥齋仗數

百人詣江陵檢捕羣小

齋仗天子齋內精仗手也茹音如帥讀曰率

敕之曰

子響若束手自歸可全其命以平南內史張欣泰為諧

之副

按齊書張欣泰傳時為南平內史當作南平

欣泰謂諧之曰今段之行

勝既無名負成奇恥彼凶狡相聚所以為其用者或利

賞逼威無由自潰若頃軍夏口宣示禍福可不戰而擒

也

夏戶推翻

諧之不從欣泰興世之子也

張興世見一百三十一卷宋明帝泰

始二

年諧之等至江津築城燕尾洲

燕尾洲在江津戌西江水至此北合靈溪

水子響白服登城頻遣使與相聞曰天下豈有兒反身

不作賊直是麤疎今便單舸還闕受殺人之罪

使疏吏翻舸古

我何築城見捉邪尹略獨荅曰誰將汝反父人共語

將翻引

也子響唯灑泣

灑泣揮淚也

乃殺牛具酒饌餉臺軍

饌雖惡翻又雖

晚翻略弃之江流子響呼茹法亮法亮疑畏不肯往又求

見傳詔法亮亦不遣且執錄其使

錄收也使疏吏翻

子響怒遣

所養勇士收集州府兵二千人從靈溪西渡子響自與

百餘人操萬鈞弩宿江隄上明日府州兵與臺軍戰子

響於隄上發弩射之臺軍大敗尹略死詣之等單艇逃

去

操七刀翻射而亦翻艇待鼎翻小船也

上又遣丹陽尹蕭順之將兵繼

至

將即亮翻

子響即日將白衣左右三十人乘舫艫沿流赴

建康

舫艇亦小船也舫步格翻艇莫幸翻

太子長懋素忌子響順之之發

建康也太子密諭順之使早為之所勿令得還子響見

順之欲自申明順之不許於射堂縊殺之

縊於賜翻又於計翻考

異曰齊書日子響部下恐懼各逃散子響乃白服出降詔賜死蓋蕭子顯為順之諱耳今從南史按順之梁武帝之父蕭子顯者仕梁朝而作齊書故通鑑言其為順之諱子響臨死啓上曰臣罪

踰山海分甘斧鉞

分扶問翻

敕遣詣之等至竟無宣旨便建

旗入津對城南岼築城守臣累遣書信呼法亮乞白服

相見法亮終不肯羣小怖懼

怖普布翻

遂致攻戰此臣之罪

也臣此月二十五日束身投軍希還天闕停宅一月

希望

也宅謂建康諸王宅也

臣自取盡可使齊代無殺子之譏臣免逆

父之謫既不遂心今便命盡臨啓哽塞知復何陳

塞志則翻

復扶又翻

有司奏絕子響屬籍

屬籍宗屬之籍也今謂之玉牒

削爵土易姓

蛸氏

蛸相邀翻與蕭音相近

諸所連坐別下考論

謂子響之黨當連坐者別行下

考覈論定其罪也下戶嫁翻

久之上遊華林園見一猿透擲悲鳴問

左右

句斷

曰猿子前日墜崖死上思子響因嗚咽流涕如

法亮頗為上所責怒蕭順之慙懼發疾而卒豫章王嶷

表請收葬子響不許

子響先嘗出繼巖故以舊恩請收葬

貶為魚復侯

魚復

縣時屬巴東郡應劭曰復音腹

子響之亂方鎮皆啓子響為逆兖州刺

史垣榮祖曰此非所宜言正應云劉寅等孤負恩獎逼

迫巴東使至于此上省之以榮祖為知言

省悉景翻

臺軍焚

燒江陵府舍官曹文書一時蕩盡上以大司馬記室南

陽樂鵠屢為本州僚佐引見問以西事

見賢通翻

鵠應對詳

敏上悅用為荊州治中敕付以修復府州事鵠繕修廨

舍數百區

解古臨翻

頃之咸畢而役不及民荆部稱之九

月癸丑魏太皇太后馮氏殂高祖勺飲不入口者五日

勺音酌挹抒之器也周禮考工記梓人為飲器勺一升

哀毀過禮中部曹華陰楊

椿諫曰

據北史楊椿傳時為中部法曹華戶化翻

陛下荷祖宗之業

荷下可翻臨

萬國之重豈可同匹夫之節以取僵仆

僵居良翻

羣下惶灼

莫知所言

惶恐也遽也灼熱也

且聖人之禮毀不滅性

孝經曰三

民無以死傷生毀不滅性此聖人之政也

縱陛下欲自賢於萬代

楊椿此語說出魏孝

文心

其若宗廟何帝感其言為之一進粥

偽為于

於是諸

王公皆詣闕上表請時定兆域

兆域謂葬地從先帝之兆

及依漢魏

故事并太皇太后終制既葬公除

公除者以天下為公而除服也

詔曰

自遭禍罰恍惚如昨

恍惚乎往翻惚音忽鄭玄曰恍惚思念益深之時也

奉侍梓

宮猶希髣髴

事死如事生猶其髣髴見之也

山陵遷厝所未忍聞冬十

月王公復上表固請

復扶又翻

詔曰山陵可依典冊衰服之

宜情所未忍

謂未忍公除也哀讀與練同倉回翻

帝欲親至陵所戊辰詔

諸常從之具悉可停之

從才用翻

其武衛之官防侍如法

法常

法也不撤武衛備不虞也

癸酉葬文明太皇太后于永固陵

陵在方山不從

金陵之兆

甲戌帝謁陵王公固請公除詔曰比當別叙在心

比並也並當別叙在心
之所欲言比毗互翻

已卯又謁陵唐辰帝出至思賢

門右

據魏紀太和元年起朱明思賢門蓋平城宮之南門也

與羣臣相慰勞

勞力到翻

太尉丕等進言曰臣等以老朽之年歷奉累聖國家舊

事頗所知聞伏惟遠祖有大諱之日唯侍從梓宮者凶

服

從才用翻

左右盡皆從吉四祖三宗因而無改

四祖者高祖昭成帝

太祖道武帝世祖太武帝顯祖獻文帝三宗者太宗明元帝恭宗景穆帝高宗文成帝

陛下以至

孝之性哀毀過禮伏聞所御三食不滿半溢

禮喪大記曰君之喪

子食粥朝一溢米暮一溢米食之無筭注云二十兩為一溢於粟米之法為米一升二十四分升之一孔穎達

曰案律歷志黃鍾之律其實一審律歷志合爲合則二十四銖合重兩十合爲一升升重十兩二十兩則米二升與此不同者但古秤有二法說左傳百二十斤爲石則一斗十二斤爲兩則一百九十二兩則一升爲十兩有奇今一兩爲二十四銖則二十兩爲四百八十銖計十九兩有奇爲一升則摠有四百六十銖八參以成四百八十銖唯有十九銖二參在是爲米一升二十四分升之一此大略而言之陳言曰以紹興一升得漢五升晝夜不釋經帶喪服麻在首腰皆曰經首經象緇布冠腰經象大帶經之言實也哀之言

摧也表經明中實摧痛也

臣等叩心絕氣坐不安席願少抑至慕之

情奉行先朝舊典

朝直造翻

帝曰哀毀常事豈足闕言朝夕

食粥粗可支任

粗生五翻任音壬勝也堪也

諸公何足憂怖

怖普布翻祖

宗情專武畧未修文教朕今仰稟聖訓庶習古道論時

比事又與先世不同太尉等國老政之所寄於典記舊

式或所未悉

典記謂經
典傳記也

且可知朕太意其餘古今喪禮

朕且以所懷別問尚書游明根高閭等公可聽之

游明
根高

閭時以儒鳴故
帝別與之言

帝因謂明根等曰聖人制卒哭之禮授

服之變皆奪情以漸

禮親始死哭無時謂朝夕哭之外
哀至則哭也既葬而虞既虞而卒

哭自此朝夕之間哀至不哭猶朝夕哭三年之喪服斬
衰期而小祥既祥而練再暮而大祥既祥而禫又三月

而除服卒
子恤翻

今則旬日之間言及即吉特成傷理對曰臣

等伏尋金冊遺音

蓋以文明太后遺音書之金冊也

踰月而葬葬而即

吉故於下葬之初奏練除之事帝曰朕惟中代所以不

遂三年之喪蓋由君上違世繼主初立君德未流臣義

不洽故身襲袞冕行即位之禮朕誠不德在位過紀

宋

帝泰始七年魏孝文受禪至是十九年此言在位過紀蓋以宋蒼梧王元徽四年顯祖方殂踰年改元太和至是十四年故云在位過紀

十二年為一紀過古禾翻

足令億兆知有君矣於此之

時而不遂哀慕之心使情禮俱失深可痛恨高閭曰杜

預晉之碩學論自古天子無有行三年之喪者以為漢

文之制閭與古合雖叔世所行事可承踵是以臣等懼

懼干請

懼洛侯翻懼
懼敬謹貌

帝曰竊尋金冊之旨所以奪臣子

之心令早即吉者慮廢絕政事故也羣公所請其志亦

然朕今仰奉冊令俯順羣心不敢闇默不言以荒庶政

闇音陰

唯欲哀麻廢吉禮

哀吐回翻下哀
經除哀從哀同

朔望盡哀誠情

在可許故專欲行之如杜預之論於孺慕之君諒闇之

主蓋亦誣矣

孺慕如孺子
之慕父母也

秘書丞李彪曰

曹操為魏王
置秘書令丞

漢明德馬后保養章帝母子之道無可間然

間古
覓翻

及后

之崩葬不淹旬尋已從吉

漢章帝建初四年六月癸丑明德皇后崩七月壬戌葬史

不書公除之日此言葬不淹旬尋已從吉以漢文三十六日釋服之制推之也

然漢章不受譏

明德不損名願陛下遵金冊遺令割哀從議帝曰朕所

以眷戀衰經不從所議者實情不能忍豈徒苟免咄嫌

而已哉

哀倉回翻咄充之翻

今奉終儉素一已仰遵遺冊但痛慕

之心事繫於予庶聖靈不奪至願耳高間曰陛下既不

除服於上臣等獨除服於下則為臣之道不足又親御

哀麻復聽朝政

復扶又翻朝直遙翻

吉凶事雜臣竊為疑帝曰先

后撫念羣下卿等哀慕猶不忍除奈何令朕獨忍之於
至親乎今朕逼於遺冊唯望至暮雖不盡禮蘊結差申
羣臣各以親疎貴賤遠近為除服之差庶幾稍近於古
易行於今高閭曰昔王孫裸葬士安去棺其子皆從而

不違

近其斯翻易以豉翻去羌呂翻漢武帝時楊王孫家累千金厚自奉養生無所不致及病且終先令

其子曰吾欲贏葬以及吾真必無易吾志則為布囊盛尸入地七尺既下從足引脫其囊以身親土其子不忍往問其友人祁侯祁侯與之辨難往復而王孫終守其說祁侯曰善遂贏葬晉人皇甫謐字士安著論曰生不能保七尺之軀死何故隔一棺之土然則衣衾所以穢身棺槨所以隔真吾氣絕之後便即時服幅巾故衣以

簾蔭累尸擇不毛之土穿阮下尸簾蔭之外
便以親土若不如如此則冤悲沒世其子從之今親奉遺

令而有所不從臣等所以頻煩干奏李彪曰三年不改

其父之道可謂大孝

引論語孔子之言

今不遵冊令恐涉改道

之嫌帝曰王孫士安皆誨子以儉及其遵也豈異今日

改父之道殆與此殊縱有所涉甘受後代之譏未忍今

日之請羣臣又言春秋烝嘗事難廢闕

禮曰喪三年不祭言帝若行三

年之喪則宗廟之祭將至廢闕也

帝曰自先朝以來恒有司行事

朝直

恒戶登翻

朕賴蒙慈訓常親致敬今昊天降罰人神喪恃

詩曰

無母何恃
喪息浪翻

賴宗廟之靈亦輟歆祀

賴蜀本作想當從之否則賴字衍歆尹今

翻

脫行饗薦恐乖冥旨羣臣又言古者葬而即吉不必

終禮此乃二漢所以經綸治道魏晉所以綱理庶政也

治直吏
翻下同

帝曰既葬即吉蓋季俗多亂權宜救世耳二漢

之盛魏晉之興豈由簡畧喪禮遺忘仁孝哉平日之時

公卿每稱當今四海晏然禮樂日新可以參美唐虞比

盛夏商

夏戶
雅翻

及至今日即欲苦奪朕志使不踰於魏晉

如此之意未解所由

解戶
翻曉也

李彪曰今雖治化清晏然

江南有未賓之吳漠北有不臣之虜是以臣等猶懷不

虞之慮

虞防也

帝曰魯公帶經從戎

據史記武王崩成王幼管蔡反淮夷徐戎

亦並興魯公伯禽征之時有

武王之喪故帶經從戎也

晉侯墨衰敗敵

春秋時晉文公卒未

葬襄公墨衰經以敗秦師

于穀衰翁回翻敗補邁翻

固聖賢所許如有不虞雖越

絳無嫌

鄭玄曰越猶躐也絳輜車索孔穎達曰未葬之前屬絳於輜以備火災今既祭天地社稷須越

躐此絳而往祭故云越絳

音弗輜勅倫翻索志各翻

而况衰麻乎豈可於晏安

之辰豫念軍旅之事以廢喪紀哉古人亦有稱王者除

衰而諒闇終喪者

闇音陰

若不許朕衰服則當除衰拱默

委政冢宰二事之中唯公卿所擇游明根曰淵默不言

則大政將曠仰順聖心請從衰服太尉丕曰臣與尉元

歷事五帝

明元太武文成獻文并考文為五帝尉紆勿翻

魏家故事尤諱之後

三月

尤諱猶云大諱也尤甚也死者人之所甚諱也

必迎神於西禳惡於北具

行吉禮

此魏初所用夷禮也襍如羊翻

自皇始以來未之或改

皇始道武帝年

號

帝曰若能以道事神不迎自至苟失仁義雖迎不來

此乃平日所不當行

言不當用夷禮

況居喪乎朕在不言之地

謂居喪諒陰三年不言也

不應如此喋喋

喋徒協翻喋喋多言也便語也

但公卿執

奪朕情遂成往復追用悲絕遂號慟羣官亦哭而辭出

號戶高翻

初太后忌帝英敏恐不利於已欲廢之盛寒閉於

空室絕其食三日召咸陽王禧將立之太尉東陽王丕

尚書右僕射穆泰尚書李冲固諫乃止帝初無憾意唯

深德丕等泰崇之玄孫也

穆崇魏開國功臣

又有宦者諧帝於

太后太后杖帝數十帝默然受之不自申理及太后殂

亦不復追問

不復追問諧者為誰復扶又翻

甲申魏主謁永固陵辛卯

詔曰羣官以萬機事重屢求聽政但哀慕纏綿未堪自

力近侍先掌機衡者皆謀猷所寄且可委之如有疑事

當時與論決 交州刺史清河房法乘專好讀書常屬

疾不治事

好呼到翻屬之欲翻屬托也屬疾猶言託疾也治直之翻

由是長史伏登

之得擅權改易將吏不令法乘知

將直亮翻下同

錄事房季文

白之法乘大怒繫登之於獄十餘日登之厚賂法乘妹

夫崔景叔得出因將部曲襲州

襲州治也

執法乘謂之曰使

君既有疾不宜煩勞囚之別室法乘無事復就登之求

書讀之

復扶又翻

登之曰使君靜處

處昌呂翻

猶恐動疾豈可看

書遂不與乃啓法乘心疾動不任視事

任音士

十一月乙

卯以登之為交州刺史法乘還至嶺而卒

嶺即大庾嶺也史言徒讀

書而無政事者

不足以當方任

十二月己卯立皇子子建為湘東王

初太祖以南方錢少更欲鑄錢建元末奉朝請孔

顓上言

少詩沼翻朝直遙顓魚豈翻異曰齊紀作孔覲今從齊書南史

考

以為食貨

相通理執自然李悝云糴甚貴傷民甚賤傷農甚賤甚

貴其傷一也

李悝魏文侯之師韋昭曰民謂士工商悝苦回翻

三吳國之閭與

比歲時被水潦而糴不貴

比毗至翻被皮義翻

是天下錢少非穀

賤此不可不察也鑄錢之弊在輕重屢變重錢患難用

而難用為累輕

累力瑞翻

輕錢弊盜鑄而盜鑄為禍深民所

以盜鑄嚴法不能禁者由上鑄錢惜銅愛工也惜銅愛

工者意謂錢為無用之器以通交易務欲令質輕而數

多使省工而易成

易以政翻

不詳慮其為患也夫民之趨利

如水走下

用漢晁錯之言趨讀曰趣走音奏

今開其利端從以重刑是

導其為非而陷之於死豈為政歟漢興鑄輕錢民巧偽者多至元狩中始懲其弊乃鑄五銖錢周郭其上下令

不可磨取鋁

漢初行半兩錢及英錢一面有文一面漫民盜磨其漫面取其鋁以重鑄作錢元狩

鑄五銖文漫兩面皆周市為郭今不得磨取鋁鋁音谷銅屑也

而計其費不能相償私

鑄益少此不惜銅不愛工之效也

少詩治翻

王者不患無銅

乏工每令民不能競則盜鑄絕矣宋文帝鑄四銖至景

和錢益輕雖有周郭而鎔冶不精於是盜鑄紛紜而起

不可復禁此惜銅愛工之驗也

復扶又翻

凡鑄錢與其不衷

寧重無輕

不衷者不得輕重之中也

自漢鑄五銖至宋文帝歷五百

餘年制度世有廢興而不變五銖者明其輕重可法得

貨之宜故也案今錢文率皆五銖異錢時有耳異錢謂其文非

五銖者自文帝鑄四銖又不禁民翦鑿為禍既博鍾弊于

今豈不悲哉鍾弊也晉氏不鑄錢後經寇戎水火耗散沈

鏐沈持林翻鏐書藥翻所失歲多譬猶磨礪砥礪不見其損有時

而盡引洪武乘之天下錢何得不竭錢竭則士農工商皆喪

其業喪息浪翻民何以自存愚以為宜如舊制大興鑄錢

重五銖一依漢法若官鑄者已布於民便嚴斷翦鑿斷音

短莖也輕小破缺無周郭者悉不得行官錢細小者稱合

欽定四庫全書黃治通鑑卷一百三十七十五

銖兩稱尺權翻合音銷以為大利貧良之民塞姦巧之

路錢貨既均遠近若一百姓樂業市道無爭衣食滋殖

矣塞悉則翻樂音洛太祖然之使諸州郡大市銅炭會晏駕事

寢是歲益州行事劉峻上言峻七倫翻又五緣翻蒙山下有嚴道

銅山舊鑄錢處可以經略蒙山在今雅州嚴道縣南十里此即漢鄧通鑄錢舊處

上從之遣使入蜀鑄錢使頭更翻頃之以功費多而止自

太祖治黃籍至上謫巧者成緣准各十年百姓怨望見事

上卷四年至上謂至武乃下詔自宋昇明以前皆聽復帝時治直之翻下同

注曉復注其有謫役邊疆各許還本此後有犯嚴加翦

治長沙威王晃卒注法勇以果毅曰威吏部尚書王晏陳疾

自解上欲以西昌侯鸞代晏領選手教問之晏啓曰鸞

清幹有餘然不諳百氏百氏百家氏族也自魏晉以來率以門地用人選須編翻指鳥

舍恐不可居此職上乃止以百濟王牟大為鎮東大

將軍百濟王高車阿伏至羅及窮奇遣使如魏請為

天子討除蠕蠕使疏吏翻為于偽翻蠕人充翻魏主賜以繡袴褶及雜

絲百匹褶音習

欽定四庫全書黃治通鑑卷一百三十七十六

九年春正月辛丑上祀南郊丁卯魏主始聽政於皇

信東室自居為太后之夜至是始聽政皇信東室蓋皇信堂之東室也詔太廟四時

之祭薦宣皇帝起麇餅鴨臠起麇餅今北人能為之其餅浮軟以卷肉取之亦謂

之卷餅程大昌曰起麇餅入教起中今鬆鬆然也孝皇

后荀鵬即高皇帝肉膾藟羹昭皇后茗糲炙魚茗茶也本草曰

茗苦茶郭璞曰早採者為茶晚採者為茗糲類篇云色

青翻夢也又側草翻糲也南史庾悅作扁米糲蓋即今

之餅子是也可以皆所嗜也上夢太祖謂已宋氏諸帝常在太廟從我求食可別為吾致祠為于仙翻乃命豫章王

妃庾氏四時祠二帝二后於清溪故宅

杜佑曰蕭齊之世有清溪宮後

改為華林苑據卞彬傳清溪在臺城東宮又在清溪之東建康志曰吳大帝鑿通城北塹以洩玄武湖水發源於鍾山接於秦淮謂之清溪

牲牢服章皆用家人禮

臣光曰昔屈到嗜芰屈建去之以為不可以私欲干

國之典

屈九勿翻芰奇寄翻芰也去羌呂翻屈建屈到子也國語屈到嗜芰有疾召宗老而屬之

曰祭我必以芰及祥宗老將薦芰屈建命去之曰祭典有之國君有牛享大夫有羊饋士有豚犬之奠庶人有魚炙之薦籩豆脯醢則上下共之不羞珍異不陳庶侈夫子不以其私欲干國之典遂不用

况

子為天子而以庶人之禮祭其父違禮甚矣衛成公

欲祀相甯武子猶非之

左傳僖三十一年狄圍衛衛遷于帝丘衛成公夢康叔謂

已曰相奪子享公命祀相甯武子不可曰鬼神非其族類不歆其祀杞鄫何事相之不享於此久矣非衛之罪也不可以間成王周公之命祀請改祀命相息亮翻而況降祀祖考於私室

使庶婦尸之乎

豫章王嶷與帝同母帝為嫡故通鑑以嶷妃為庶婦尸主也

初魏主召吐谷渾王伏連籌入朝伏連籌辭疾不至輒

修洮陽泥和二城置戍兵焉

後周武帝逐吐谷渾置洮陽郡唐洮州及臨潭縣所

治即洮陽城也泥和即水經注所謂迷和城洮水逕其南又在洮陽城東宋白曰洮州臨洮郡郡城本名洮陽在洮水之北乃吐谷渾所築南臨洮水極峻險今謂之洪和城吐從嗽入聲谷音浴洮音七刀翻

二月

乙亥魏枹罕鎮將長孫百年請擊二戍

魏枹罕鎮將帶河州刺史枹音

膚將音即兩翻

長音知兩翻

魏主許之

散騎常侍裴昭明散騎侍

郎謝竣如魏弔

散音悉重翻騎音奇寄翻竣音七倫翻又丑緣翻

欲以朝服行

事

朝音直遙翻下同

魏主客曰弔有常禮何得以朱衣入凶庭

昭明等曰受命本朝不敢輒易往返數四昭明等固執

不可魏主命尚書李冲選學識之士與之言冲奏遣著

作郎上谷成淹昭明等曰魏朝不聽使者朝服出何典

禮淹曰吉凶不相厭

厭於葉翻

羔裘玄冠不以弔

論語記孔子容止有

是此童稚所知也

稚直利翻

昔季孫如晉求遭喪之禮以行

左傳文六年季文子將聘于晉使求遭喪之禮以行其人曰將焉用之文子曰備豫不虞古之善教也求而無之實難過今卿自江南遠來弔魏方問出何典禮行人求何害

得失何其遠哉昭明日二國之禮應相準望

準揆平之物又其義

擬也做也對看為望月有弦望後漢律歷志分天之中相與為衡謂之望謂月望日月正相對其平如衡準望之言義齊高皇帝之喪魏遣李彪來弔初不素服齊朝取諸此

亦不以為疑

帝即位之初魏遣彪來聘非弔也昭明欲以是抗止淹耳

何至今日獨

見要逼

要讀日邀

淹曰齊不能行亮陰之禮踰月即吉彪奉

使之日齋之君臣鳴玉盈庭貂璫曜目

漢制侍中常侍之冠加黃金璫

貂尾以飾之晉宋以後王公皆冠貂蟬使疏吏翻

彪不得主人之命敢獨以素

服廁其間乎皇帝仁孝侔於有虞執親之喪居廬食粥

豈得以此方彼乎昭明曰三王不同禮孰能知其得失

淹曰然則虞舜高宗皆非邪昭明竣相顧而笑曰非孝

者無親

孝經之言

何可當也乃曰使人之來唯齋袴褶此既

戎服不可以帛

晉志曰袴褶之制未詳所起近世凡車駕親戎中外戎嚴服之服無定色使疏

吏翻褶音習

唯主人裁其帛服然達本朝之命返必獲罪淹

曰使彼有君子卿將命得宜且有厚賞若無君子卿出

而光國得罪何傷自當有良史書之乃以衣帛給昭明

等

帛苦洽翻

使服以致命己丑引昭明等入見文武皆哭盡

哀魏主嘉淹之敏遷侍郎

淹又云自著作郎遷著作郎

今從魏書賜絹百匹昭明駟之子也

裴駟松之子注史記行于世駟音因

始興簡王鑑卒三月甲辰魏主謁永固陵夏四月癸

亥朔設薦於太和廟

太和廟據北史作太和殿水經注太和殿在太極殿東堂之東魏書

帝紀太和元年起太和安昌二殿

魏主始進蔬食追感哀哭終日不飯

侍中馮誕等諫經宿乃飯甲子罷朝夕哭

蓋亦不能及暮矣飯扶晚

翻

乙丑復謁永固陵

復扶又翻

魏自正月不雨至于癸酉有

司請祈百神帝曰成湯遭旱以至誠致雨

謂湯以六事自責也

固

不在曲禱山川今普天喪恃

喪息浪翻

幽顯同哀何宜四氣

未周

謂一暮而四時之氣始周

遽行祀事唯當責躬以待天譴

譴去戰翻

甲戌魏員外散騎常侍李彪等來聘為之置燕設樂

為于

彪辭樂且曰主上孝思罔極興隆正失

言行喪禮興百王之

隆典而正其失也

去三月晦朝臣始除衰經猶以素服從事

朝直

遙翻哀吐回翻

是以使臣不敢承奏樂之賜朝廷從之彪凡六

奉使

據魏紀上即位之初年至三年彪凡四來聘是年再聘通前凡六使疏吏翻

上甚重之

將還上親送至琅邪城命羣臣賦詩以寵之

左傳晉趙武自宋還

過鄭鄭伯享之于垂隴七穆皆從趙孟曰七子從君以寵武也請皆賦詩以卒君貺

已卯魏作

明堂改營太廟 五月己亥魏主更定律令於東明觀

魏主太和四年起東明觀觀古玩翻更工行翻

親決疑獄命李冲議定輕重潤

色辭旨帝執筆書之李冲忠勤明斷加以慎密為帝所

委情義無間

斷丁亂翻

舊臣貴戚莫不心服中外推之 乙

卯魏長孫百年攻洮陽泥和二戍克之俘三千餘人

丙辰魏初造五輅

五輅玉金象草木也

六月甲戌以尚書左僕

射王真為雍州刺史

為後誅真張本雍於用翻

丁未魏濟陰王鬱

以貪殘賜死

濟子禮翻

秋閏七月乙丑魏主謁永固陵

已卯魏主詔曰烈祖有創業之功世祖有開拓之德宜

為祖宗百世不遷平文之功少於昭成而廟號太祖

道武

帝天興初追尊平文帝為太祖少詩治翻

道武之功高於平文而廟號烈祖

明元帝追尊道武帝為烈祖

於義未允朕今奉尊烈祖為太祖以世

祖顯祖為二桃

鄭玄曰廟之為言貌也宗廟者先祖之象貌也桃之言超也超上去意也

餘

皆以次而遷八月壬辰又詔議養老及禋于六宗之禮

尚書禋于六宗而諸儒互說不同王并以易六子達立六宗祠王肅亦以為易六子摯虞以為月令孟冬天子祈來年于天宗天宗六宗之神也劉邵以為萬物負陰而抱陽冲氣以為和六宗者太極冲和之氣為六氣之宗者也虞書謂之六宗周書謂之天宗孔穎達曰王肅六宗之說用家語之文以四時也寒暑也日也月也水旱也為六宗孔注尚書同之伏生與馬融以天地四時為六宗劉歆孔晁以乾坤之子六為六宗賈逵以為天宗三日月星也地宗三河海岱也今尚書歐陽夏戾說六宗者上及天下及地旁及四方中央恍惚助陰陽變化有益於人者也古尚書說天宗日月北辰岱河海也日月為陰陽宗北辰為星宗河為水宗岱為山宗海為

澤宗鄭玄以星也辰也司中也司命也風伯也雨師也
為六宗虞喜別論曰地有五色太社象之摠五為一則
咸六六為地數推校經傳別無他祭也劉昭以為此說
近得其實張髦曰父祖之廟六宗即三昭三穆也魏文
帝以天皇大帝五帝為六宗杜佑取之鄭氏曰禋之言烟周人尚臭烟氣之臭聞者先是魏常以

正月吉日於朝廷設幕中置松柏樹設五帝座而祠之

先卷又有探策之祭帝皆以為非禮罷之戊戌移道壇

於桑乾之陰改曰崇虛寺此即鬼譙之道壇也乙巳帝

引見羣臣見賢問以禘祫王鄭之義是非安在考異

作太和十三年五月壬戌今從本紀尚書游明根等從鄭中書監高閭等

從王詔園丘宗廟皆有禘名從鄭禘祫并為一祭從王

著之於令

記大傳曰禮不王不禘王者禘其祖之所自出以其祖配之鄭氏注曰凡大祭曰禘大祭

其先祖所由生謂郊祀天也王者之先皆感太微五帝

之精以生皆用正歲之正月郊祭之又祭法言虞夏殷

周禘郊祖宗之法鄭注云禘郊祖宗謂祭祀以配食也

此禘謂祭昊天於園丘也孔穎達曰王肅論引賈逵說

吉禘于莊公禘者遠也審諦昭穆連主通位孫居王父

之處又引禘于太廟遠禮昭尸穆尸其祝辭摠稱孝子

孝孫則是父子並列遠禮又云皆升合於太祖所以劉

歆賈逵鄭衆馬融等皆以為然鄭不從者以公羊傳為

正遠禮不可用也左氏說及杜元凱皆以為禘三年一

大祭在太祖之廟傳無祫文然則祫即禘也取其序昭

穆謂之禘取其合集羣祖謂之祫杜佑通典孝文帝太

和十三年詔鄭玄云天子祭員丘曰禘宗廟大祭亦曰

禘三年一祫五年一禘祫則毀廟羣廟之主於太祖廟合而祭之禘則增及百官配食者審諦而祭之魯禮三年喪畢而祫明年而禘國丘宗廟大祭俱稱禘祭有兩禘明也王肅又云天子諸侯皆禘於宗廟非祭天之祭郊祀后稷不稱禘禘祫一名也合祭故稱祫禘而審諦之故稱禘非兩祭之名三年一祫五年一禘揔而互舉故稱五年再殷祭不言一禘一祫斷可知矣諸儒之說大略如是公卿可議其是非尚書游明根言曰鄭氏之義禘者大祭之名大祭國丘謂之禘者審諦五精星辰也大祭宗廟謂之禘者審諦其昭穆百官也國丘常合不言祫宗廟時合故言祫斯則宗廟祫禘並行國丘一禘而已宜於宗廟俱行禘祫之禮二禮異故名殊依禮春秋特初於嘗於烝則祫嘗祫烝不於三時皆行禘祫之禮中書監高閏又言禘祭國丘與鄭義同者以為有虞氏禘黃帝黃帝非虞在廟之帝不在廟非國丘又何又大傳云禘其所自出之祖又非在廟之文論語稱禘

自既灌以往據爾雅禘大祭也諸侯無禘禮惟夏祭稱禘又非宗廟之禘魯行天子之儀不敢專行國丘之禘改殷之禘取其禘名於宗廟因先有禘遂生兩名其宗廟禘祫之祭據王氏之義祫而禘禘止於一時一時者祭不欲數一歲三禘為過數詔曰明根間等據二家之義論禘祫詳矣至於事取折衷猶有未允間以禘祫為名義同王氏禘祭國丘事與鄭同無所間然明根以鄭氏等兩名兩祭並存並用理有未俱稱據二義一時禘祫而闕二時之禘事有難從先王制禮內緣人子之情外協尊卑之序故天子七廟數盡則毀藏主於太祖之廟三年而祫祭之世盡則毀以示有終之義三年而祫以申追遠之情禘祫既是一祭分而兩之事無所據毀廟三年一祫又有不盡四時於禮為闕七廟四時常祭祫則三年一祭而又不究四時於情為闕王以祫為一祭於義為長鄭以國丘為禘與宗廟大祭同名義亦為當今互取鄭王二義禘祫并為一祭從王禘是祭員丘

大祭之名上下同用從鄭若以數則清五年一禘改禘
從禘五年一禘則四時畫禘以稱今情則旅天禮文先
禘而後時祭便即施行
著之於令永為世法
戊午又詔國家饗祀諸神凡一

千二百餘處今欲減省羣祀務從簡約又詔明堂太廟
配祭配享於斯備矣白登崢山雞鳴山廟唯遣有司行

事

明元帝永興四年立宣武廟于白登山歲一祭無常
月神瑞二年帝又立宣武廟于白登西宣武帝至泰

常五年始改諡道武水經注雞鳴山在廣甯郡下洛縣
于延水北昔趙襄子殺代王於夏屋而并其土襄子之
姊代王夫人也遂磨笄自殺代人憐之為立祠因名為
磨笄山每夜有野雞羣鳴於祠屋上故亦名為鳴雞山
文成帝保母常氏葬於是山別立寢廟太
武帝保母竇氏葬崢山別立寢廟崢音郭
馮宣王廟在

長安宜敕雍州以時供祭

馮宣王太后父朗也為秦雍二州刺史生后於長安後諡

文宣王因立廟

又詔先有水火之神四十餘名及城北

星神今園丘之下既祭風伯雨師司中司命

鄭衆曰風師箕也雨

師畢也司中三台三階也司命文昌宮星玄曰司中司命文昌第五第四星或曰中台上台也

明堂祭

門戶井竈中雷

鄭氏曰中雷猶中室也古者複穴是以名室為雷音力又翻

四十神

悉可罷之甲寅詔曰近論朝日夕月

三代之禮春朝朝日秋暮夕月朝直

送皆欲以二分之一日於東西郊行禮然月有餘閏行無

常準若一依分日或值月於東而行禮於西序情即理

不可施行昔秘書監薛謂等以為朔日以朏夕月以朏

日月所會謂之合朔月生明謂之朏月之三日也朏數尾翻

卿等意謂朔朏二分何

者為是尚書游明根等請用朔朏從之丙辰魏有司上

言求卜祥日

此小祥也

詔曰筮日求吉既乖敬事之志又違

永慕之心今直用晦日九月丁丑夜帝宿於廟帥羣臣

哭已

已畢也帥讀曰率

帝易服縞冠草帶黑屨侍臣易服黑介

幘

隋志幘尊卑貴賤皆服之文者長耳謂之介幘武

者短耳謂之平上幘各稱其冠而制之縞古老翻

白絹單衣草帶烏履遂哭盡乙夜戊子晦帝易祭服縞冠

素紕

紕匹也翻又必二

白布深衣

記曰古者深衣蓋有制度以應規矩繩權

衡短毋見膚長毋被土續衽鉤邊要縫半下袼之高下可以運肘袂之長短反詘之及肘帶下毋厭髀上毋厭

脅當無骨者制十有二幅以應十二月袂圓以應規曲袷如矩以應方負繩及踝以應直下齊如權衡以應平

故聖人服之先王貴之

麻繩履侍臣去幘易帽

弁缺四隅謂之帽傅子曰帽先未有

岐荀文若巾觸樹成岐時人慕之因而弗改今通為慶弔之服白紗為之或單或袂去羗呂翻既祭出

廟帝立哭久之乃還

還從宣翻又如字下同

冬十月魏明堂太

廟成 庚寅魏主謁永固陵毀瘠猶甚穆亮諫曰陛下

祥練已闕號慕如始

古者既祥而練闕古穴翻終也說文曰闕事已也號戶乃翻如始言

如初有喪

王者為天地所子為萬民父母未有子過哀而父

母不戚父母憂而子獨悅豫者也今和氣不應風旱為

災願陛下褰輕服御常膳鑾輿時動咸秩百神

秩者序而祭之

庶使天人交慶詔曰孝悌之至無所不通今飄風旱氣

皆誠慕未濃幽顯無感也所言過哀之咎諒為未衷

衷善

也正也適也

十一月己未朔魏主禪於太和廟

禪徒感禱除服之祭也

袞冕以祭既而服黑介幘素紗深衣拜陵而還癸亥冬至魏主祀圜丘遂祀明堂還至太和廟乃入甲子臨太

華殿服通天冠絳紗袍以饗羣臣

劉昭曰通天冠高九寸正豎頂少邪乃直

下為鐵卷梁前有山展甬為述乘輿所常服也杜佑曰秦制通天冠其狀遺失漢因秦名制高九寸正豎頂少邪乃直下為鐵卷梁前有山展甬為述駸犀簪導乘輿所常服晉因漢制前加金博山述述即鵠也鵠知天雨故冠像焉前有展甬宋因之又加黑介憤東昏侯改用玉簪導梁武帝因之復加冕於其上謂之平天冕隋因之加金博山附蟬十二首施珠翠黑介憤玉簪導唐因之其纓改以翠綵樂縣而不作

縣讀曰懸

丁卯服袞冕辭太和廟帥百官奉神主遷于新廟

新作太廟

成故遷主新廟帥讀曰率

乙亥魏大定官品戊戌考諸牧守

守式又翻

魏假通直散騎常侍李彪等來聘

魏舊制羣臣李

冬朝賀服袴褶行事謂之小歲

朝直送朝褶音習

丙戌詔罷之

十二月壬辰魏遷社於內城之西

魏以安定王休

為太傅齊郡王簡為太保

高麗王璉卒壽百餘歲

麗力

知魏主為之制素委貌布深衣

為于偽翻委貌冠長七寸高四寸制如覆盂前

高廣後卑銳所謂夏之母追殷之章甫者也本以皂絹為之今制素者以舉哀

舉哀於東郊遣

謁者僕射李安上策贈太傅謚曰康孫雲嗣立

乙酉

魏主始迎春於東郊自是四時迎氣皆親之

初魏世

祖克統萬及姑臧獲雅樂器服工人

宋文帝元嘉四年魏克統萬十六年

克姑臧晉永嘉之亂太常樂工多避地河西並存之其
夏克長安獲秦雅樂故二國有其器服工人

後累朝無留意者

朝直
遙翻

樂工浸盡音制多亡高祖始命

有司訪民間曉音律者議定雅樂當時無能知者然金

石羽旄之飾稍壯麗於往時矣辛亥詔簡置樂官使修

其職又命中書監高閭參定初晉張斐杜預共注律

三十卷自泰始以來用之

此晉泰
始也

律文簡約或一章之

中兩家所處生殺頓異

處昌
呂翻

臨時斟酌吏得為姦上留

心法令詔獄官詳正舊注七年尚書刪定郎王植集定

二注表奏之

魏晉以來尚書諸曹無刑定郎此蓋刑定律注而置官

詔公卿八座

參議考正竟陵王子良總其事衆議異同不能壹者制

旨平決是歲書成廷尉山陰孔稚珪上表以為律文雖

定苟用失其平則法書徒明於表裏

表與帙同

冤冤猶結於

獄中竊尋古之名流多有法學今之士子莫肯為業縱

有習者世議所輕將恐此書永淪走吏之手矣今若置

律助教依五經例國子生有欲讀者策試高第即加擢

用以補內外之官庶幾士流有所勸慕

幾居希翻

詔從其請

事竟不行 初林邑王范陽邁世相承襲

范陽邁見一百二十四卷

宋文帝元嘉

二十三年

夷人范當根純攻奪其國遣使獻金簪等

物詔以當根純為都督緣海諸軍事林邑王

為下范諸農攻當根

純張本使疏吏翻

魏州刺史咸陽王禧入朝

朝直

有司奏

冀州民三千人稱禧清明有惠政請世昨冀州魏主詔

曰利建雖古未必今宜

易曰利建侯

經野由君理非下請

周禮

惟王建國辨方正位體國經野鄭玄注云經謂為之里數

以禧為司州牧都督司豫

等六州諸軍事

初魏文明太后寵任宦者略陽苻承

祖官至侍中知都曹事

知尚書都曹事也

賜以不死之詔太后

殂承祖坐賊應死魏主原之削職禁錮於家仍除悖義

將軍封佞濁子

悖滿內翻

月餘而卒承祖方用事親姻爭趨

附以求利

超七喻翻

其從母楊氏為姚氏婦

從母即姨也從才用翻

獨

否常謂承祖之母曰姊雖有一時之榮不若妹有無憂

之樂

樂音洛

姊與之衣服多不受彊與之

彊其兩翻下彊使同

則曰

我夫家世貧美衣服使人不安不得已或受而埋之與之奴婢則曰我家無食不能飼也常著弊衣自執勞苦

飼祥吏翻
著則略翻

承祖遣車迎之不肯起彊使人抱置車上則

大哭曰爾欲殺我由是苻氏內外號為癡姨及承祖敗

有司執其二姨至殿廷其一姨伏法帝見姚氏姨貧弊

特赦之 李惠之誅也

事見一百三十四卷
宋順帝昇明二年

思皇后之

昆弟皆死

魏孝文謚其母李
貴人曰思皇后

惠從弟鳳為安樂王長樂

主簿長樂坐不軌誅

事見一百三十五卷高帝建
元元年從才用翻樂皆音洛

鳳亦

坐死鳳子安祖等四人逃匿獲免遇赦乃出既而魏主

訪舅氏存者得安祖等皆封侯加將軍既而引見謂曰

卿之先世再獲罪於時

先世謂惠及鳳見賢通翻

王者設官以待賢

才由外戚而舉者季世之法也卿等既無異能且可還

家自今外戚無能者視此後又例降爵為伯去其軍號

軍號將軍之號

也去羌呂翻時人皆以為帝待馮氏太厚待李氏太

薄太常高閭嘗以為言帝不聽及世宗尊寵外家乃以

安祖弟興祖為中山太守追贈李惠開府儀同三司中

山公謚曰莊

十年春正月戊午朔魏主朝饗羣臣於太華殿懸而不

樂 已未魏主宗祀顯祖於明堂以配上帝遂登靈臺

以觀雲物降居青陽左个布政事

鄭氏曰青陽左个大宸東堂北偏

自

是每朔依以為常

散騎常侍庾革等聘於魏魏主使

侍郎成淹引革等於館南瞻望行禮

祀明堂登靈臺之禮

辛酉魏

始以太祖配南郊魏主命羣臣議行次

五行之次也

中書監

高閭議以為帝王莫不以中原為正統不以世數為與

奪善惡為是非故桀紂至虐不廢夏商之歷厲惠至昏

無害周晉之錄晉承魏為金趙承晉為水燕承趙為木

秦承燕為火秦之既亡魏乃稱制立朔且魏之得姓出

於軒轅

魏書曰魏之先出自黃帝軒轅氏黃帝子昌意受封北國有大鮮卑山因以為號據史記以匈奴為夏后氏苗裔蓋有此理

臣愚以為宜為土德

按魏書帝紀道武天興元年羣臣奏

國家承黃帝之後宜為土德高閭蓋申前議耳

祕書丞李彪著作郎崔光等議

以為神元與晉武往來通好至于桓穆志輔晉室

事並見晉

紀神元力微也桓帝狩

是則司馬祚終於邾邾

河南郡河南縣

也穆帝狩廬好呼到邾

周之王城即邾邾也

邾古洽翻邾音辱

而拓跋受命於雲代昔秦并天下

漢猶比之共工卒繼周為火德

漢律歷志曰祭典曰共工氏霸九域言雖有水

德在火木之間非其序也任智刑以彊故霸而不王秦
以水德在周漢木火之間周人遵其行序故易不載卒
子恤翻共
請曰恭
況劉石苻氏地禍世促魏承其弊豈可捨晉

而為土邪司空穆亮等皆請從彪等議壬戌詔承晉為

水德祖申臘辰

考異曰禮志太和十五年正月穆亮等言云云按帝紀十六年正月壬戌詔

定行次以水承金蓋志誤以六為五耳

甲子魏罷祖課

祖課李延壽魏紀作祖裸

魏宗室及功臣子孫封王者衆乙丑詔自非烈祖之胄

餘王皆降為公公降為侯而品如舊蠻王桓誕亦降為

公唯上黨王長孫觀以其祖有大功特不降

長孫道生以功封上

黨王長知兩朝

丹楊王劉昶封齊郡公加號宋王

昶丑兩朝

魏舊

制四時祭廟皆用中節丙子詔始用孟月擇日而祭

漢自

以來宗廟成五祀四五及臘是也魏初用中節夷禮也

以竟陵王子良領尚書

令魏主毀太華殿為太極殿戊子徙居永樂宮

魏主太和

元年起永樂遊觀于平城之北苑樂音洛

以尚書李冲領將作大匠與司空

穆亮共營之

辛卯魏罷寒食饗

舊傳冬至後一百五日為寒食初學記曰

周舉移書魏武明罰令陸翽鄴中記並云寒食斷火起於介子推然周禮司烜氏仲春以木鐸徇火禁於國中注云為仲春將出火今寒食準節氣是仲春之末清明是三月之初然則禁火並周制也魏先以寒食饗祖宗

今以其非禮罷之

甲午魏主始朝日于東郊自是朝日夕月皆

親之

朝直
通翻

丁酉詔祀堯於平陽舜於廣甯禹於安邑周

公於洛陽

皆因其故都而祀之皇甫謐曰舜所都或言蒲阪或言瀋瀋今上谷也廣甯縣本屬上谷

又據水經注瀋當作瀋

皆令牧守執事

守式
又翻

其宣尼之廟祀於中

書省丁未改謚宣尼曰文聖尼父帝親行拜祭魏舊制

每歲祀天於西郊魏主與公卿從二千餘騎戎服遶壇

謂之踰壇

騎奇寄翻踰與踏同

明日復戎服登壇致祀已又遶壇

謂之遶天

蕭子顯曰戎服遶壇魏主一周公卿七匝謂之踰壇明日復戎服登壇祠天魏主遶三匝

公卿七匠謂之
遼天復扶又翻

三月癸酉詔盡省之 辛巳魏以高麗

王雲為督遼海諸軍事遼東公高句麗王詔雲遣其世

子入朝

句如字又音
駒麗力智翻

雲辭以疾遣其從叔升干隨使者

詣平城

從才
用翻

夏四月丁亥朔魏班新律令大赦 辛

丑豫章文獻王嶷卒

嶷魚
力翻

贈假黃鉞都督中外諸軍事

丞相喪禮皆如漢東平獻王故事嶷性仁謹廉儉不以

財賄為事齋庫失火

齋庫齋
內之庫

燒荊州還資

高祖建元二
年嶷自荊州

還為揚州評直三千餘萬

評直論量
其所直也

主局各杖數十而已疾

篤遺令諸子曰才有優劣位有通塞運有貧富此自然

之理無足以相陵侮也

蓋欲諸子不以位執相陵塞悉則翻

上哀痛特甚

久之語及薨猶歎歔流涕

歔音希又許氣翻歔音虛

薨卒之日第庫

無見錢

見賢過翻

上敕月給薨第錢百萬終上之世乃省

五月己巳以竟陵王子良為揚州刺史

魏文明太后

之喪使人告于吐谷渾吐谷渾王伏連籌拜命不恭

吐從

瞰入聲谷音浴

羣臣請討之魏主不許又請還其貢物帝曰貢

物乃人臣之禮今而不受是弃絕之彼雖欲自新其路

無由矣因命歸洮陽泥和之俘

去年長孫百年所俘

秋七月庚申

吐谷渾遣其世子賀虜頭入朝于魏

朝直遙翻下同考異曰魏吐谷渾

傳作賀魯頭

詔以伏連籌為都督西垂諸軍事西海公

今從帝紀

吐谷渾王遣兼員外散騎常侍張禮使於吐谷渾伏連

籌謂禮曰曩者宕昌常自稱名而見謂為大王今忽稱

僕又拘執使人欲使偏師往問何如禮曰君與宕昌皆

為魏藩比輒興兵攻之殊違臣節

使疏吏翻宕徒浪翻比毗至翻

離京

師之日宰輔有言以為君能自知其過則藩葉可保

離力

智翻謂可保藩臣之業也

若其不悛禍難將至矣

悛丑緣翻難乃旦翻

伏連籌

默然

甲戌魏遣兼員外散騎常侍廣平宋弁等來聘

及還魏主問弁江南何如弁曰蕭氏父子無大功於天

下既以逆取不能順守政令苛碎賦役繁重朝無股肱

之臣野有愁怨之民其得沒身幸矣非貽厥孫謀之道

也 八月乙未魏以懷朔鎮將陽平王頤鎮北大將軍

陸叡皆為都督督十二將步騎十萬分為三道以擊柔

然 鎮將二將即亮翻騎奇寄翻 考異曰魏帝紀太和

十一年八月壬申蠕蠕犯塞遣平原王陸廠討之事

具蠕蠕傳十六年八月乙未詔湯平王願左僕射陸叡討蠕蠕按蠕蠕傳無十一年犯塞及征討事唯有十六年八月願叡出征事與紀合蓋十一年紀誤也

中道出黑山東道趣士盧河西

道趣侯延河軍過大磧大破柔然而還

趣七喻翻磧七迹翻

初

柔然伏名敦可汗

可從列入聲汗音寒

與其叔父那蓋分道擊高

車阿伏至羅伏名敦屢敗那蓋屢勝國人以那蓋為得

天助乃殺伏名敦而立那蓋號侯其伏代庫者可汗

魏收

曰魏言悅樂也

改元太安

魏司徒尉元大鴻臚卿游明根累

表請老魏主許之引見

尉紆勿翻臚陵六翻見賢遍翻

賜元玄冠素衣

石渠論玄冠朝服戴聖曰玄冠委貌也今此則玄冠委貌異制

明根委貌青紗單衣及

被服雜物等而遣之魏主親養三老五更於明堂已酉

詔以元為三老明根為五更帝再拜三老親袒割牲執

爵而饋肅拜五更

周禮九拜九曰肅拜鄭司農云肅拜但俯下手今時禮是也陸德明曰禮

於至翻即今之揖更工衡翻

且乞言焉元明根勸以孝友化民又養

庶老國老於階下禮畢各賜元明根以步挽車及衣服

步挽車不用牛馬使人步挽之

祿三老以上公五更以元卿

元卿即上卿

九月甲寅魏主序昭穆於明堂

昭之招翻

祀文明太后於玄

室

玄室北史作玄堂鄭玄曰玄堂北堂也

辛未魏主以文明太后再薨哭

於永固陵左終日不輟聲凡二日不食甲戌辭陵還永

樂宮 武興氏王楊集始寇漢中至白馬梁州刺史陰

智伯遣軍主桓盧奴陰冲昌等擊破之俘斬數千人集

始走還武興請降于魏辛巳入朝于魏

降戶江翻朝直遥翻

魏以

集始為南秦州刺史漢中郡侯武興王 冬十月甲午

上殷祭太廟

殷祭大祭也

庚戌魏以安定王休為大司馬

特進馮誕為司徒誕熙之子也

馮熙見一百三十二卷宋順帝昇明元年熙文

明后之兄也

魏太極殿成 十二月司徒參軍蕭琛范雲

聘于魏

琛丑林胡

魏主甚重齊人親與談論顧謂羣臣曰江

南多好臣侍臣李元凱對曰江南多好臣一易主江

北無好臣百年一易主魏主甚慙上使太子家令沈

約撰宋書疑立袁粲傳審之於上

傳直戀翻

上曰袁粲自是

宋室忠臣

此人心之公是非不可泯者

約又多載宋世祖太宗諸鄙

瀆事上曰孝武事迹不容頓爾我昔經事明帝卿可思

諱惡之義

春秋之義為尊者諱

於是多所刪除

是歲林邑王范

陽邁之孫諸農帥種人攻范當根純復得其國

范當根純奔林

邑國事見上年帥請曰率種章勇翻復扶又翻

詔以諸農為都督緣海諸軍事

林邑王 魏南陽公鄭義與李冲昏姻冲引為中書令

出為西兖州刺史

西兖州時治滑臺

在州貪鄙文明太后為魏

主納其女為嬪

后為于偽翻嬪吐賓翻

徵為祕書監及卒尚書奏

謚曰宣詔曰蓋棺定謚激揚清濁故何曾雖孝良史載

其繆醜

事見八十卷晉武帝咸寧四年

賈充有勞直士謂之荒公

事見八十

一卷晉武帝太康三年謚法昏亂紀度曰荒

義雖宿有文業而治闕廉清

治直

吏部尚書何乃情違至公愆違明典依謚法博聞多見曰
翻文不勤成名曰靈可贈以本官加謚文靈



資治通鑑卷一百三十七



總校官庶吉士臣侍朝

校對官庶吉士臣嚴福

謄錄監生臣彭希純

欽定四庫全書薈要

史部

齊治通鑑卷一百三十八

詳校官編修臣汪鏞



資治通鑑卷一百三十八

宋司馬光撰

胡三省音註

齊紀四

昭陽作
靈一年

世祖武皇帝下

永明十一年春正月以驃騎大將軍王敬則為司空

驃匹

妙翻騎
奇寄翻

鎮軍大將軍陳顯達為江州刺史顯達自以門

寒位重

陳顯達南彭城
人起於卒伍

每遷官常有愧懼之色戒其子

勿以富貴陵人而諸子多事豪侈顯達聞之不悅

以陳顯達

之居寵思畏終不能自免於猜暴之朝至于稱兵而死豈非繫於所遇之時哉

子休尚為郢府

主簿過九江

目建康至郢府先過九江

顯達曰麀尾蠅拂

麀腹庾翻麀麀屬尾

能生風辟蠅蠅陸佃埤雅曰麀似鹿而大其尾辟麀以置舊帛中能令歲久紅色不黧又以拂纒令纒不蠹名苑曰鹿之大者曰麀麀鹿隨之皆視麀所往麀尾所轉為準於文主鹿為麀古之談者揮焉良為是也

是

王謝家物汝不須捉此

言不須以風流自標置也捉執也

即取於前燒

之初上於石頭造露車三千乘欲步道取彭城魏人

知之劉昶數泣訴於魏主乞處邊戍招集遺民以雪私

耻

以蕭氏篡宋夷滅劉氏故也數所角翻處昌呂翻

魏主大會公卿於經武殿

魏書帝紀太和十二年

起經武殿以議南伐於淮泗間大積馬芻上聞

之以右衛將軍崔慧景為豫州刺史以備之

為下魏八寇張本

魏遣員外散騎侍郎邢巒等來聘

散悉亶翻騎寄翻

巒穎之

孫也

穎曹魏太常邢貞之後邢穎見一百二十二卷宋文帝元嘉八年

丙子文惠太

子長懋卒太子風韻甚和上晚年好遊宴

好呼到翻

尚書曹

事分送太子省之由是威加内外

省悉景翻

太子性奢靡治

堂殿園囿過於上宮

治直之翻

費以千萬計恐上望見之乃

傍門列修竹凡諸服玩率多僭侈啓於東田起小苑使

東宮將吏更番築役

將即亮翻更工衛翻更番分番更作也

營城包巷彌

亘華遠

言其彌極華麗而延亘又遼遠也

上性雖嚴多布耳目太子所

為人莫敢以聞上嘗過太子東田見其壯麗大怒收監

作主帥太子皆藏之由是大被誚責

監工衛翻帥所類翻被皮義翻誚才

笑又使嬖人徐文景造輦及乘輿御物

嬖卑義翻又博計翻乘繩證翻

上嘗幸東宮忽忽不暇藏輦

忽忽者急遽之意

文景乃以佛像

內輦中故上不疑文景父陶仁謂文景曰我正當掃墓

待喪耳

掃墓謂掃除墓地也

仍移家避之後文景竟賜死陶仁遂

不哭及太子卒上履行東宮

行下孟翻

見其服玩大怒敕有

司隨事毀除以竟陵王子良與太子善而不啓聞并責

之太子素惡西昌侯鸞嘗謂子良曰我意中殊不喜此

人不解其故

惡烏路翻喜許記翻解戶買翻曉也

當由其福薄故也子良

為之救解

為于偽翻

及鸞得政太子子孫無遺焉

西昌侯夷滅太子子

孫事見後按鸞翦除高武諸子及太子子孫以成篡事文惠雖不惡之其子孫亦不能免也觀隆昌建武時事君子謂文惠知所惡矣

二月魏主始耕藉田於平城南

魏起於北荒未

嘗講古者天子親耕之禮
今孝文始行之藉在亦翻

雍州刺史王奐惡寧蠻長

史劉興祖收繫獄

雍於用翻惡烏路翻蕭子顯齊志寧
蠻府屬雍州別領西新安義寧南襄

北建武蔡陽永安安定懷化武寧新陽義安高安左義
陽南襄城廣昌東襄城北襄城懷安北弘農西弘農析

陽北義陽漢廣
中襄城等蠻郡

誣其搆扇山蠻欲為亂敕送興祖下建

康

自襄陽順流東
至建康故曰下

奐於獄中殺之詐云自經上大怒遣

中書舍人呂文顯直閣將軍曹道剛將齋仗五百人收

奐

齋仗齋庫精仗以給禁
衛勇力之士將即亮翻

敕鎮西司馬曹虎從江陵步

道會襄陽奐子彪素凶險奐不能制長史殷叡奐之壻

也謂臯曰曹呂來既不見真敕恐為奸變正宜錄取

錄

也攝馳啓聞耳臯納之

拒命考異曰南史臯子彪議閉門

使不過臯官免爵耳彪堅執不回

敕又請遣典籤問道

送啓臯從之典籤出城為文顯所執

敕曰忠不背國勇

不逃死勸臯仰藥

敕輒發州兵千餘人開庫配甲仗

與彪同誅今從齊書

彪輒發州兵千餘人開庫配甲仗

出南堂陳兵閉門拒守臯門生鄭羽叩頭啓臯乞出城

迎臺使

使疏吏翻

臯曰我不作賊欲先遣啓自申正恐曹呂

等小人相陵藉

陵者侮之而出其上藉者蹈之使薦於下藉慈夜翻

故且閉門自

守耳彪遂出與虎軍戰兵敗走歸三月乙亥司馬黃瑤

起寧蠻長史河東裴叔業於城內起兵攻奐斬之

為後奐子

肅食瑤起之內張本

執彪及弟爽弼殷殷皆伏誅彪兄融琛死於

建康琛弟秘書丞肅獨得脫奔魏

為王肅屢引魏兵入寇張本琛丑林翻

考異曰南史奐弟份自拘請罪帝宥之肅屢引魏人至邊帝謂份曰比有北信不份曰肅近忘墳柏寧遠憶有臣按奐以三月死帝以七月殂是冬肅始見魏主於鄴南史誤也齊書無此語

夏四月甲午

立南郡王昭業為皇太孫東宮文武悉改為太孫官屬

東宮官屬文則太傅少傅詹事率更令家令僕門大夫中庶子中舍人庶子洗馬舍人武則左右衛率翊軍

兵屯騎三校尉旅賁中郎將左右積弩將以太子妃琅
軍殿中將軍員外殿中將軍常從虎賁督

邪王氏為皇太孫太妃南郡王妃何氏為皇太孫妃妃

戢之女也

何戢見一百三十五卷高帝建元二年戢則立翻又疾立翻

魏太尉丕

等請建中宮戍成立皇后馮氏后熙之女也

為後馮后以說廢張

本魏主以白虎通云

漢章帝集諸儒於白虎觀議五經同異作白虎通

王者不

臣妻之父母下詔令太師上書不稱臣入朝不拜

朝直遙翻

熙固辭光城蠻帥征虜將軍田益宗帥部落四千餘

戶叛降於魏

沈約曰光城郡疑大明中分弋陽所立五代史志曰光州光山縣舊置光城郡蠻帥

所類翻宗帥讀曰率降戶江翻

五月壬戌魏主宴四廟子孫於宣文

堂親與之齒用家人禮

四廟子孫謂世祖恭宗高宗顯祖之子孫也太和十二年宣

文堂經武殿用家人禮者畧君臣之敬而序長幼之齒

甲子魏主臨朝堂

朝直遙翻

引公卿以下決疑政錄因徒帝謂司空穆亮曰自今朝廷政事日中以前卿等先自論議日中以後朕與卿等共決之 丙子以宜都王鏐為南豫州刺史

鏐丘耕翻

先是

廬陵王子卿為南豫州刺史

先悉薦翻

之鎮道中戲部伍為

水軍上聞之大怒殺其典籤以鏐代之子卿還第上終

身不與相見

襄陽蠻酋雷婆思等帥戶千餘求內徙

於魏魏人處之河北

是時河北之地猶為齊境雷婆思等蓋居河南徙居河北則稍近魏

境耳首慈由翻帥

魏主以平城地寒六月雨雪

極陰之地

讀曰率處昌呂翻

咸夏雨雪雨主遇

風沙常起

風沙大風揚沙也

將遷都洛陽恐

羣臣不從乃議大舉伐齊欲以脅衆齋於明堂左个

鄭玄

曰明堂左个大寢南堂東偏也个古賀翻

使太常卿王謏筮之遇革帝曰湯

武革命應乎天而順乎人

此革卦之彖辭也謏氏壬翻

吉孰大焉羣

臣莫敢言尚書任城王澄曰陛下奕葉重光帝有中土

任音壬重直龍翻

今出師以征未服而得湯武革命之象未為

全吉也帝厲聲曰繇云大人虎變何言不吉

繇直又翻大人虎變

革九五爻辭九五君位也故引以難澄

澄曰陛下龍興已久何得今乃虎

變帝作色曰社稷我之社稷任城欲沮衆邪澄曰社稷

雖為陛下之有臣為社稷之臣安可知危而不言帝久

之乃解曰各言其志夫亦何傷既還宮

自明堂左个還宮

召澄

入見逆謂之曰嚮者革卦今當更與卿論之明堂之忿

恐人人競言沮我大計故以聲色怖文武耳想識朕意

見賢通翻沮在呂翻怖普布翻

因屏人謂澄曰今日之舉誠為不易

屏必

郢翻易以鼓翻

但國家興自朔土徙居平城此乃用武之地非

可文治今將移風易俗其道誠難朕欲因此遷宅中原

卿以為何如

魏主始與任城王澄言其情

澄曰陛下欲卜宅中土以

經畧四海此周漢所以興隆也

比之周成漢光也

帝曰北人

習常戀故必將驚擾奈何

後穆泰等之謀卒如帝所慮

澄曰非常之

事故非常人之所及陛下斷自聖心

斷丁亂翻

彼亦何所能

為帝曰任城吾之子房也

張良贊漢高帝遷都長安故以為比

六月丙戌

命作河橋欲以濟師祕書監盧淵上表以為前代承平

之主未嘗親御六軍決勝行陣之間

行戶剛翻陳讀曰陣

豈非勝

之不足為武不勝有虧威望乎昔魏武以弊卒一萬破

袁紹

事見六十三卷漢獻帝建安五年

謝玄以步兵三千摧苻秦

事見一百

五卷晉孝武帝太元八年

勝負之變決於須臾不在衆寡也詔報曰

承平之主所以不親戎事或以同軌無敵或以懦劣偷

安今謂之同軌則未然

天下混一則車同軌書同文

比之懦劣則可

耻必若王者不當親戎則先王制革輅何所施也

周制五輅

革輅龍勒條纓五就建大白以即戎鄭氏注革輅輅之以革而漆之無他飾條讀為條

魏武之勝

蓋由仗順符氏之敗亦由失政豈寡必能勝衆弱必能

制彊邪丁未魏主講武命尚書李冲典武選

時欲用兵命冲典武

選銓擇才勇之士選須絹翻

建康僧法智與徐州民周盤龍等作

亂

此又一周盤龍非周奉叔之父

夜攻徐州城入之刺史王玄邈討誅

之

徐州城即鍾離城

秋七月癸丑魏立皇子恂為太子

為魏主後

廢恂張本

戊子魏中外戒嚴發露布及移書稱當南伐用

尚神密魏主今露其事以布告四方故亦曰露布移書則移書於齊境也

詔發揚徐州民丁

廣設名募以備之中書郎王融自恃人地

王融有俊才故以人身自

高且王弘曾孫
故以門地自高
三十內望為公輔嘗夜直省中撫案歎

曰為爾寂寂

爾如此也寂寂言冷寞也

鄧禹笑人

鄧禹年二十四為漢司徒融年已過

之故行逢朱雀桁開喧湫不得進

朱雀桁當建康朱雀門跨秦淮南北岸以

渡行人大路所由也桁開則行者填咽湫子小翻隘也經典釋文曰湫徐音秋又在酒翻

捉車壁歎

曰車前無八騶何得稱丈夫

捉傳追翻車前有油壁自晉以來諸公諸從公車前

給騶八人騶側鳩翻

竟陵王子良愛其文學特親厚之融見上有

北伐之志數上書獎勸

獎者推助以成其事數所角翻

因大習騎射

奇騎

寄及魏將入寇子良於東府募兵板融寧朔將軍

宋泰始初

南攻義嘉軍功者製板不能供始用黃紙今板授融蓋重於黃紙也或曰未經勅用者謂之板授

使典

其事融傾意招納得江西僉楚數百人並有幹用

僉助庶翻

會上不豫詔子良甲仗入延昌殿侍醫藥子良以蕭衍

范雲等皆為帳內軍主戊辰遣江州刺史陳顯達鎮樊

城上慮朝野憂遑

遑急也遽也

力疾召樂府奏正聲伎

江左以清

商為正聲伎伎渠綺翻

子良日夜在內太孫間日參承

間日隔一也間古

覓翻參侯也承奉也

戊寅上疾亟蹙絕

氣暫絕而不息也

太孫未入內外

惶懼百僚皆已變服王融欲矯詔立子良詔草已立蕭

衍謂范雲曰道路籍籍皆云將有非常之舉王元長非

濟世才

王融字元長

視其敗也雲曰憂國家者惟有王中書

耳衍曰憂國欲為周召邪欲為豎刁邪

召讀曰邵按左傳齊桓公既立

子昭為太子易牙有寵於衛姬衛姬生無虧易牙因豎刁以薦羞於桓公遂有寵公許之立無虧公卒易牙入與豎刁殺羣吏而立無虧昭奔宋宋襄公伐齊殺無虧而立昭是為孝公雲不敢荅及太孫

來王融戎服絳衫於中書省閤口斷東宮仗不得進

斷音

短頃之上復蘇

復扶又翻

問太孫所在因召東宮器甲皆入

以朝事委尚書左僕射西昌侯鸞

朝直遙翻

俄而上殂

年五四

融處分以子良兵禁諸門

處昌呂翻分扶問翻

鸞聞之急馳至雲

龍門不得進鸞曰有敕召我排之而入奉太孫登殿命

左右扶出子良指麾部署音響如鐘殿中無不從命融

知不遂釋服還省

釋戎服還中書省也

歎曰公誤我由是鬱林王

深怨之

太孫即位尋見廢弒史以追廢之號書之為後殺王融張本

遺詔曰太孫進

德日茂社稷有寄子良善相毗輔思弘治道

治直吏翻

內外

衆事無大小悉與鸞參懷共下意

參豫也懷思也命鸞參豫其事而詳思其

可否也其下意者令降心相從以濟國事也

尚書中事職務根本悉委右僕

射王宴吏部尚書徐孝嗣軍旅之畧委王敬則陳顯達

王廣之王玄邈沈文季張瓌薛淵等

自此以上皆遺詔之辭瓌古回翻

世祖留心政事務摠大體嚴明有斷郡縣久於其職長

吏犯法封刃行誅故永明之世百姓豐樂賊盜屏息然

頗好遊宴華靡之事常言恨之未能頓遣

達祛也逐也言未能祛逐

遊宴之失也自此以上史述帝平生之大畧斷鬱林王

丁亂翻長知兩翻樂音洛屏必郢翻好呼到翻

之未立也衆皆疑立子良口語喧騰武陵王畢於衆中

大言曰若立長則應在我

世祖諸弟存者畢為長長知兩翻

立嫡則應

在太孫

鬱林王諱昭業字元尚小字法身文惠太子長子也以世嫡立為皇太孫

由是帝深

憑賴之

太孫已即位故書帝

直問周奉叔曹道剛素為帝心膂並

使監殿中直衛少日復以道剛為黃門郎

監古衙翻少詩召翻復扶

又翻為西昌侯鸞欲執帝先除周奉叔曹道剛張本

初西昌侯鸞為太祖所愛

事見

一百三十五卷鸞性儉素車服儀從同於素士所居官

名為嚴能故世祖亦重之

鸞初為安吉令有嚴能之名王子侯舊乘經帷車鸞獨乘

下帷車儀從如素士從才用翻

世祖遺詔使竟陵王子良輔政鸞知尚

書事子良素仁厚不樂世務

樂音洛

乃更推鸞故遺詔云

事無大小悉與鸞參懷子良之志也

史言子良無奪嫡之志

帝少

養於子良妃袁氏

少詩
治翻

慈愛甚著及王融有謀

史言奪嫡之謀

出于
王融

遂深忌子良大行出太極殿子良居中書省帝使

虎賁中郎將潘敞領二百人仗屯太極殿西階以防之

中書省蓋在太極殿西故使屯於西階以防子良賁音奔將即亮翻

既成服諸王皆出子

良乞停至山陵不許

乞停中書省俟梓宮出葬而後出也

壬午稱遺詔以

武陵王暉為衛將軍與征南大將軍陳顯達並開府儀

同三司尚書左僕射西昌侯鸞為尚書令太孫詹事沈

文季為護軍

史言遺詔本無此段除授當時稱遺詔行之

癸未以竟陵王子

良為太傅蠲除三調及衆逋

三調為調粟調帛及雜調也逋欠負也

省御

府及無用池田邸治

治據蕭子顯齊書當作治謂治鑄之所也

減關市征稅

先是蠲原之詔多無事實督責如故

所謂黃放白催也先悉荐翻

是

時西昌侯鸞知政恩信兩行衆皆悅之

史為西昌侯鸞篡國張本

魏山陽景桓公尉元卒

尉紆勿翻

魏主使錄尚書事廣陵

王羽持節安撫六鎮發其突騎

騎奇奇翻下同

丁亥魏主辭永

固陵己丑發平城南伐步騎三十餘萬使太尉丕與廣

陵王羽留守平城並加使持節

晉制使持節得殺二千石以下杜佑曰留守周

之君陳似其任也此後無聞漢和帝南巡祠園廟張禹以太尉兼衛留守晉惠帝幸長安僕射荀藩等與遺官在洛者為留臺承制行事其後安帝播遷劉裕亦置留臺後魏孝文帝南伐以太尉丕廣陵王羽留守京師留守之制羽曰太尉宜專節度臣止可為副魏主曰老者

之智少者之決

言老者經事多故智慮深遠少者氣盛故臨事有斷少詩召翻

汝無辭

也以河南王幹為車騎大將軍都督關右諸軍事又以司空穆亮安南將軍盧淵平南將軍薛胤皆為幹副衆

合七萬出子午谷

欲攻梁孟也

胤辭之曾孫也

薛胤見一百一十八卷晉

安帝義熙十三年

鬱林王性辨慧美容止善應對哀樂過人

樂音洛世祖由是愛之而矯情飾詐陰懷鄙惡與左右羣

小共衣食同臥起始為南郡王從竟陵王子良在西州

帝少養於子良妃袁氏子良為揚州刺史故帝從在西州文惠太子每禁其起居節

其用度王密就富人求錢無敢不與別作鑰鉤鉤所以啓鑰今

謂之鑰匙夜開西州後閣與左右至諸營署中淫宴師史仁

祖侍書胡天翼王國有師掌導之教訓侍書掌教之書翰相謂曰若言之二

宮二宮謂上宮及東宮也則其事未易易以若於營署為異人所

毆口手

及犬物所傷豈直罪止一身亦當盡室及禍年

各七十餘生豈足吝邪數日間二人相繼自殺二宮不

知也

人莫知其子之惡其斯之謂歟

所愛左右皆逆加官爵疏於黃紙

使囊盛幣之

咸時征翻

許南面之日依此施行侍太子疾及

居喪憂容號毀

號戶翻

見者嗚咽裁還私室即歡笑酣飲

常令女巫楊氏禱祀連求天位及太子卒

文惠太子卒於是年正月

謂由楊氏之力倍加敬信既為太孫

是年夏四月自南郡王為太孫

世

祖有疾又令楊氏禱祀時何妃猶在西州

太孫居東宮何妃尚留西

世祖疾稍危太孫與何妃書紙中央作一大喜字而

作三十六小喜字繞之侍世祖疾言發淚下世祖以為

必能負荷大業

荷下可翻又讀如字

謂曰五年中一委宰相汝勿

措意五年外勿復委人

復扶又翻

若自作無成無所多恨臨

終執其手曰若憶翁當好作

作音佐韓愈方橋詩曰非閣復非船可居兼可過若

欲問方橋方橋如此作注云白樂天皮日休詩皆自注曰音佐朱元晦曰今按廣韻作造也荀子肉腐出蟲魚枯生蠹貪利忘身禍哉乃作音將祚翻及廉范五袴之謠皆以為此音矣然讀為佐音者又將祚之訛也而世俗所用從人從故而切為

遂殂大斂始畢悉呼世祖諸

伎備奏衆樂即位十餘日即收王融下廷尉

斂力賄翻
伎渠綺翻

下戶使中丞孔稚珪奏融險躁輕狡招納不逞誹謗朝

政朝直融求援於竟陵王子良子良憂懼不敢救遂於

獄賜死時年二十七初融欲與東海徐勉相識每託人

召之勉謂人曰王君名高望促

言名雖高而輕躁人難
知其必及禍故望促難

可輕襲衣裾

類篇襲毗祭翻弊或從
衣此云襲者義與弊同

俄而融及禍勉由

是知名太學生會稽魏準以才學為融所賞

會工
外翻融欲

立子良準鼓成其事

鼓以作氣言鼓作
融氣以成其事

太學生虞羲丘

國賓竊相謂曰竟陵才弱王中書無斷

斷丁亂翻

敗在眼中

矣及融誅召準入舍人省詰問

詰去吉翻

惶懼而死舉體皆

青時人以為膽破

壬寅魏主至肆州

魏收志肆州治九原天賜二年

為鎮真君七年置州領永安秀容雁門郡而永安郡定襄縣注云真君七年并雲中九原晉昌屬焉則知魏肆

州蓋治定襄之九原也然此定襄亦非漢之定襄縣地蓋曹魏所置新昌郡之定襄縣其地在陁嶺之南古定

襄在陁嶺之北隋志雁門郡後周置肆州隋改曰代州又有定襄郡開皇五年置雲州總管府此蓋因古定襄

以名郡參考可知矣宋白曰後魏置肆州於九原非古九原漢末曹公所置定襄郡之九原縣也唐為秀容縣

忻州定襄郡治焉後魏書云太平四見道路民有跛眇年置肆州治秀容州領靈丘等八郡

者停駕慰勞

勞力到翻

給衣食終身

此亦可謂惠而不知為政矣見者則給衣食目

所不見者豈能偏給其衣食哉古之為政者孤獨廢疾者皆有以養之宣必待身親見而後養之也跛補火翻

跛者一足偏短眇者一目偏盲眇亡沼翻

大司馬安定王休執軍士為盜者

三人以狗於軍將斬之魏主行軍遇之

行下孟翻循行也

命赦

之休不可曰陛下親御六師將遠清江表今始行至此而小人已為攘盜不斬之何以禁奸帝曰誠如卿言然王者之體時有非常之澤三人罪雖應死而因緣遇朕雖違軍法可特赦之既而謂司徒馮誕曰大司馬執法

嚴諸君不可不慎

馮誕后戚既親且貴故語之以儆百司

於是軍中肅然

臣光曰人主之於其國譬猶一身視遠如視邇在境如在庭舉賢才以任百官修政事以利百姓則封域之內無不得其所矣是以先王黹纊塞耳前旒蔽明欲其廢耳目之近用推聰明於四遠也

東方朔曰冕而前旒所以

蔽明黹纊充耳所以塞聰如淳注曰黹音主荀翻謂以玉為瑱用黹纊懸之也師古曰如說非也黹黃色也纊綿也以黃綿為丸用組懸之垂兩耳邊示不外聽非玉瑱之懸也塞悉則翻

彼廢疾者

宜養當命有司均之於境內今獨施於道路之所遇

則所遺者多矣其為仁也不亦微乎況赦罪人以撓

有司之法

撓奴教訓

尤非人君之體也惜也孝文魏之賢

君而猶有是乎

戊申魏主至并州并州刺史王襲治有聲跡

治直吏訓

境內

安靜帝嘉之襲教民多立銘置道側虛稱其美帝聞而

問之襲對不以實帝怒降襲號二等

號者所領將軍號也

九月

壬子魏遣兼員外散騎常侍勃海高聰等來聘 丁巳

魏主詔車駕所經傷民秋稼者畝給穀五斛 辛酉追

尊文惠太子為文皇帝廟號世宗

世祖梓宮下渚

渚在

東府前秦
淮之渚也

帝於端門內奉辭輶轅車未出端門亟稱疾

還內

端門宮之正南門內大
內也輶音溫轅音涼

裁入閣即於內奏樂伎鞞

鐸之聲響震內外

伎渠綺翻
鞞頻達翻

丙寅葬武皇帝於景安陵

廟號世祖

景安陵亦在武進帝遺詔所命陵名也在休
安陵東所卜第三處休安陵蓋帝祖宋大常

樂子所葬高帝受
禪尊為休安陵

戊辰魏主濟河庚午至洛陽壬申

詣故太學觀石經

故太學漢
魏所營者

乙亥鄧至王像舒彭遣

其子舊朝于魏

朝直
達翻

且請傳位於舊魏主許之

魏主

自發平城至洛陽霖雨不止丙子詔諸軍前發丁丑帝

戎服執鞭乘馬而出羣臣稽顙于馬前

稽顙于前將諫南伐也稽音啓

帝曰廟算已定大軍將進諸公更欲何云尚書李冲等

曰今者之舉天下所不願唯陛下欲之臣不知陛下獨

行竟何之也

言違衆南伐無異獨行

臣等有其意而無其辭敢以

死請帝大怒曰吾方經營天下期于混壹而卿等儒生

屢疑大計斧鉞有常卿勿復言

此亦所以怖羣臣而決遷都之計也復扶又翻

策馬將出于是安定王休等並慙勤泣諫帝乃諭羣臣

曰今者興發不小動而無成何以示後朕世居幽朔欲

南遷中土苟不南伐當遷都於此王公以為何如欲遷

者左不欲者右南安王楨進曰成大功者不謀於衆秦引

商鞅之言今陛下苟輟南伐之謀遷都洛邑此臣等之願蒼

生之幸也羣臣皆呼萬歲時舊人雖不願內徙舊人謂與魏同

起于北荒之子而憚於南伐無敢言者遂定遷都之計孫即所謂國人

李冲言於上曰陛下將定鼎洛邑宗廟宮室非可馬上

遊行以待之願陛下暫還代都俟羣臣經營畢功然後

備文物鳴和鸞而臨之帝曰朕將巡省州郡

省悉景翻

至鄴

小停春首即還未宜歸國

不肯歸北蓋慮北人歸代復戀土重遷也

乃遣任

城王澄還平城諭留司百官以遷都之事曰今日真所

謂革也

謂前並之遇革今之遷都真以革北方之俗易說卦曰革去故也

王其勉之帝

以羣臣意多異同謂衛尉卿鎮南將軍于烈曰卿意如

何烈曰陛下聖略淵遠非愚淺所測若隱心而言

隱度也度

徒洛翻

樂遷之與戀舊適中半耳

樂音洛中竹仲翻

帝曰卿既不

唱異言

不唱為異言也

即是有同深感不言之益使還鎮平城

曰留臺庶政一以相委烈栗磾之孫也

于栗磾事魏道武帝建將也磾

丁奚翻

先是北地民支酉聚衆數千起兵於長安城北石

山

北地郡魏孝文帝大和十一年置班州十四年改邠州按水經注石山當在長安城東北有數谷數水出

馬北流注於渭先悉薦翻

遣使告梁州刺史陰智伯

欲邀結齊師以爲應援使疏吏

翻

秦州民王廣亦起兵應之攻執魏刺史劉藻秦雍間

七州民皆響震

七州雍岐秦南秦涇邠華也雍於用翻

衆至十萬各守堡

壁以待齊救魏河南王幹引兵擊之幹兵大敗支酉進

至咸陽北濁谷穆亮與戰又敗

考異曰齊書穆亮作繆老生今從魏書陰

智伯遣軍主席德仁等將兵數千與相應接酉等進向

長安盧淵薛盾等拒擊大破之降者數萬口

降戶

淵唯

誅首惡餘悉不問獲酉廣並斬之

冬十月戊寅朔魏

主如金墉城徵穆亮

徵穆亮於闕右

使與尚書李冲將作大匠

董爾經營洛都

董爾北史作董爵

己卯如河南城己酉如豫州

自金墉西如河南又自河南東如豫州北豫州謂虎牢城也魏明元帝改虎牢置豫州獻文帝取懸弧又置豫

州以虎牢為北豫州今主太和十九年罷北豫州置東中府

癸巳舍于石濟乙未魏

解嚴設壇于滑臺城東告行廟以遷都之意

遷都之議既定停南

伐之師故解嚴奉神主而行故有行廟

大赦起滑臺宮任城王澄至平城

衆始聞遷都莫不驚駭澄援引古今徐以曉之衆乃開

伏

開發也伏厭伏也言北人安土重遷蔽於此說不肯降心以相從澄援引曉喻以發其蒙莫不厭伏也

澄還報於滑臺魏主喜曰非任城朕事不成 壬寅尊

皇太孫太妃為皇太后

即文惠太子妃王氏也

立妃為皇后

即何妃也

癸卯魏主如鄴城王肅見魏主於鄴

是年三月王肅奔魏今方得見

魏陳伐齊之策魏主與之言不覺促席移晷

降人初至君臣情分

甚為聞疎言有當心故促席近前以聽之不覺其分自之疎也與之言而弗厭倦日為之移晷不覺其久也 自

是器遇日隆親舊貴臣莫能間也魏主或屏左右與肅

語至夜分不罷

問古覓翻
屏必郢翻

自謂君臣相得之晚尋除輔

國將軍大將軍長史時魏主方議興禮樂變華風凡威

儀文物多肅所定乙巳魏主遣安定王休率從官迎

家於平城

帥讀曰率
從才用翻

辛亥封皇弟昭文為新安王昭

秀為臨海王昭粲為永嘉王魏主築宮於鄴西十一

月癸亥徙居之御史中丞江淹劾奏前益州刺史劉

俊梁州刺史陰智伯贓貨巨萬皆抵罪初俊罷廣司二

州

按齊書劉峻傳峻出督廣州世祖自尋陽東下遇峻舟於渚間是時齊未受禪也罷廣州計當在世祖居

東宮時世祖即位峻自廣陵遷督司州徵入為長兼侍中峻七倫翻又丑緣翻

傾貲以獻世祖

家無留儲在益州作金浴盆餘物稱是及鬱林王即位

峻所獻減少

稱尺證翻少詩沿翻峻傳云峻作金浴盆等欲以獻世祖還都而世祖晏駕鬱林新

立遂減其所獻

帝怒收峻付廷尉欲殺之西昌侯鸞救之得免

猶禁錮終身峻勔之子也

劉勔死子桂陽之難

資治通鑑卷一百三十八